
Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 65. sjednici Predstavničkog doma, održanoj 15. aprila 2014. godine, i na 38. sjednici Doma naroda, održanoj 6. juna 2014. godine, usvojila je

**ZAKON
O IZMJENAMA I DOPUNAMA ZAKONA O AKCIZAMA
U BOSNI I HERCEGOVINI**

Član 1.

U Zakonu o akcizama u Bosni i Hercegovini ("Službeni glasnik BiH", broj 49/09) član 6. mijenja se i glasi:

"Član 6.

(Duhanske preradevine)

- (1) Duhanskim preradevinama u smislu člana 4. stav (2) tačka b) ovog zakona smatraju se:
 - a) cigarete
 - b) cigare i cigarilosi
 - c) duhan za pušenje
 - 1) rezani duhan za motanje cigareta
 - 2) ostali duhan za pušenje.
- (2) Cigaretama se smatraju:
 - a) smotuljci duhana prikladni za pušenje, obavijeni omotom koji nije od prirodnog duhana;
 - b) proizvodi slični cigaretama koji se sastoje od smotuljaka duhana obavijeni jednostrukim i dvostrukim omotačem. Vanjski omotač izraden je od materijala koji nije list prirodnog duhana i postavljen je u pravoj liniji uzdužno;
 - c) duhanski štapići koji su jednostavnim neindustrijskim postupkom stavljaju u papirni omot za cigarete ili se umotavaju u papirne listiće;
 - d) duhanski proizvodi stavljeni u promet pod nazivom cigarete.
- (3) Cigare i cigarilosi su smotuljci duhana koji su obavijeni vanjskim zaštitnim listom od duhana.
- (4) Duhan za pušenje obuhvata:
 - a) rezani ili na drugi način usitnjeni, pleteni ili u blokove presovani duhan koji je prikladan za pušenje bez daljnje industrijske obrade;
 - b) ostali duhan za pušenje koji je prikladan za pušenje i stavljen u maloprodaju, a koji ne potpada pod st. (2) i (3) ovog člana. Ostalim duhanom za pušenje smatraju se i ostaci listova duhana i nusproizvodi nastali preradom duhana ili proizvodnjom duhanskih preradevina."

Član 2.

U članu 12. iza stava (3) dodaje se novi stav (4) koji glasi:

- "(4) Proizvođačem duhanskih preradevina u smislu ovog zakona smatra se svako fizičko lice, poduzetnik ili pravno lice nastanjeno/sa sjedištem u Bosni i Hercegovini koje duhan preraduje u duhanske proizvode namijenjene za maloprodaju."

Član 3.

Član 21. mijenja se i glasi:

"Član 21.

(Akciza na duhanske preradevine)

- "(1) Na cigarete se plaća proporcionalna akciza u procentu na maloprodajnu cijenu i specifična akciza na 1.000 cigareta, odnosno za pakovanje od 20 komada.
(2) Na cigare i cigarilose plaća se proporcionalna akciza u procentu na maloprodajnu cijenu.
(3) Na duhan za pušenje plaća se akciza po kilogramu."

Član 4.

Iza člana 21. dodaju se čl. 21a., 21b., 21c. i 21d. koji glase:

"Član 21a.

(Akciza na cigarete)

- (1) Na cigarete se plaća akciza, i to:
a) proporcionalna, po stopi od 42% na osnovicu utvrđenu u skladu s članom 15. stav (1) tačka b) ovog zakona i
b) specifična akciza utvrđena od Upravnog odbora, kako bi se osigurala dinamika usklađivanja stopa akciza s relevantnim evropskim direktivama.
(2) Upravni odbor će najkasnije do **30. oktobra** tekuće godine utvrditi iznos specifične akcize za narednu godinu iz stava (1) tačka (b) ovog člana, sve dok ukupno akcizno opterećenje cigareta s najnižom maloprodajnom cijenom ne dostigne iznos od 176,00 KM za 1.000 komada. Godišnje povećanje specifične akcize ne može biti manje od 7,50 KM za 1.000 komada, odnosno 0,15 KM za pakovanje od 20 komada.
(3) Odluka Upravnog odbora o specifičnoj akcizi iz stava (2) ovog člana primjenjuje se od **1. januara** naredne godine.
(4) Specifična akciza za pakovanja različita od pakovanja koje sadrži 20 cigareta plaća se srazmjerno broju komada u pakovanju.

Član 21b.

(Minimalna akciza na cigarete)

- (1) Ako je obračunata akciza na cigarete prema članu 21a. stav (1) ovog zakona manja od minimalne akcize utvrđene ovim zakonom, plaća se minimalna akciza.
(2) Minimalna akciza iz stava (1) ovog člana podrazumijeva ukupnu akcizu (proporcionalnu i specifičnu) za 1.000 komada, odnosno za pakovanje od 20 komada.
(3) Minimalna akciza na cigarete iznosi najmanje 60% prosječne ponderirane maloprodajne cijene cigareta za period od 1. jula prethodne godine do 30. juna tekuće godine.
(4) Prosječna ponderirana maloprodajna cijena cigareta iz stava (3) ovog člana izračunava se na osnovu podataka UIO o izdatim akciznim markicama za period od 1. jula prethodne godine do 30. juna tekuće godine. Prosječna ponderirana maloprodajna cijena izračunava se na način da se ukupna vrijednost cigareta, sa svim uključenim porezima, za koje su izdate akcizne markice za period od 1. jula prethodne godine do 30. juna tekuće godine, podijeli s ukupnom količinom cigareta za koje su izdate akcizne markice za isti period.

- (5) Minimalnu akcizu na cigarete iz stava (3) ovog člana, izračunatu na osnovu metodologije iz stava (4) ovog člana, utvrđuje Upravni odbor najkasnije do **30. oktobra** tekuće godine za narednu godinu, a odluka Upravnog odbora o minimalnoj akcizi se primjenjuje od **1. januara** naredne godine.

Član 21c.

(Akciza na cigare i cigarilose)

Na cigare i cigarilose plaća se proporcionalna akciza po stopi od **42%** na osnovicu utvrđenu u skladu s članom 15. stav (1) tačka b) ovog zakona.

Član 21d.

(Akciza na duhan za pušenje)

- (1) Akciza na duhan za pušenje utvrđuje se **u visini od najmanje 80%** minimalne akcize na cigarete iz člana 21b. ovog zakona iskazane za 1.000 cigareta.
(2) Akcizu na duhan za pušenje utvrđuje Upravni odbor najkasnije do **30. oktobra** tekuće godine za narednu godinu, a odluka Upravnog odbora o minimalnoj akcizi primjenjuje se od **1. januara** naredne godine.
(3) Izuzetno od st. (1) i (2) ovog člana, akciza na duhan za pušenje za 2014. godinu iznositi će 78 KM/kg."

Član 5.

U članu 41. iza stava (4) dodaje se novi stav (5) koji glasi:

- "(5) Novčanom kaznom u iznosu od 1.000 KM do 3.000 KM kaznit će se fizičko lice koje stavi u promet duhanske preradevine, alkoholna pića, voćne prirodne rakije, vina i/ili kafu, a da akcizni proizvodi nisu na propisan način označeni akciznom markicom i/ili bez vjerodostojne dokumentacije."

Član 6.

U članu 42. stav (1) mijenja se i glasi:

- "(1) Uz novčanu kaznu pravnom licu i poduzetniku izreći će se zaštitna mjera oduzimanja akciznih proizvoda kojim je učinjen prekršaj iz člana 41. stav (1) tačke h) i i) ovog zakona, kao i fizičkom licu za učinjeni prekršaj iz člana 41. stav (5) ovog zakona."

Član 7.

Član 45. mijenja se i glasi:

"Član 45.

(Popis zaliha, obračun i uplata)

- (1) Poreski obveznici i druga lica koji se bave prometom duhanskih preradevina iz člana 1. stav (1) tač. b) i c) ovog zakona dužni su na dan početka primjene ovog zakona popisati zalihe ovih preradevina i popisne liste dostaviti UIO u roku od sedam dana.
(2) Poreski obveznici i druga lica koji se bave prometom duhanskih preradevina iz člana 1. stav (1) tač. b) i c) ovog zakona dužni su prijaviti nove maloprodajne cijene UIO u roku od sedam dana od dana izvršenog popisa i na novu osnovicu obračunati i uplatiti razliku akcize u roku od 10 dana od dana dostavljanja popisnih lista.
(3) Poreski obveznici i druga lica koji se bave prometom duhanskih preradevina dužni su popisati zalihe duhanskih preradevina pri svakoj promjeni maloprodajnih cijena koje prijavljuju UIO u roku od sedam dana od dana izvršenog popisa i na novu osnovicu obračunati i uplatiti razliku akcize u roku od 10 dana od dana dostavljanja popisnih lista.
(4) Izuzetno za 2014. godinu obračun specifične i minimalne akcize na cigarete vrši se u skladu s Odlukom o utvrđivanju posebne i minimalne akcize na cigarete za 2014. godinu ("Službeni glasnik BiH", broj 88/13).

- (5) Obračun akcize na duhanske preradevine koje nisu obuhvaćene Odlukom iz stava (4) ovog člana vršit će se u skladu s odredbama ovog zakona."

Član 8.

Ovaj zakon stupa na snagu osmog dana od dana objavljivanja u "Službenom glasniku BiH" a primjenjivat će se od prvog radnog dana mjeseca koji slijedi nakon stupanja na snagu ovog zakona.

Broj 01,02-02-1-17/14

6. juna 2014. godine

Sarajevo

Predsjedavajući

Predstavničkog doma

Parlamentarne skupštine BiH

Dr. Milorad Živković, s. r.

Predsjedavajući

Doma naroda

Parlamentarne skupštine BiH

Dr. Dragan Čović, s. r.

